

吹

景

集

吹景集卷之七

烏程

董斯張遐周著

韓昌箕仲弓訂

克殷度邑二解補伏生書

世儒謂周書出汲冢乃克殷度邑二解載史記確
爲逸書非後儒竄入者太史公去伏生不甚遠其
辭亦近之余意以史載湯誥及二解補伏生今文
書而以古文別爲一錄熙甫蒨侯而在必有賞余
言者賈生書云紂已死玉門之上武王使人帷而

守之大白小白千古厚誣升庵集及金罍子已有
辯余錄克殷解依史記自武王旣入始度邑解依
汲冢書有一二未安者酌二書參用之以文字異
同者疏其下孔晁注周書株草草索隱正義亦多
秕僻間綴以鄙見所以便觀者也或曰齊宣王曰
臣弑其君何居應之曰發伐辛焚非弑乎疇手办
之謂哉

克殷解

序曰武王率六州之兵車三百五十乘以滅殷作尅

殷

武王既入立於社南大卒之左右畢從

汲冢云王入卽位于社太卒之右羣臣畢從孔晁
云太卒屯兵以衛也按史記云武王使師尚父與
百夫致師以大卒馳帝紂師正義曰大卒謂戎車
三百五十乘士卒二萬六千二百五十人有虎賁
三千人

毛叔鄭奉明水

張曰郊特牲云酒醴之美而玄酒明水之尚貴五

味之本也又云祭齊加明水報陰也明水浼齊貴
新也正義云明水謂以陰鑑取月中之水也按歐
陽修集古錄云右毛伯古敦銘原父爲予考按其
事云史記武王克商尚父牽牲毛叔鄭奉明水則
此銘謂鄭者毛叔鄭也銘稱伯者爵也史稱叔者
字也敦乃武王時器也據歐公之言則尅殷度邑
二解斷爲逸書無可疑者而予補書之說益信實
之前聖而無疑矣

衛康叔封布茲

汲冢作衛叔傳禮徐廣曰茲者藉席之名索隱曰
茲一作笠公明草也按康謚也當依汲冢作衛叔
汲冢少一封字當補公羊傳曰衛侯屬負茲爾雅
曰蓐謂之茲素問云色如草茲周禮司几筵掌五
几五席之名物五几在右玉雕彤素漆也五席莞
纁次蒲熊也凡大朝覲設莞筵加纁席加次席祀
先王昨席亦如之注云莞管也纁藻也次以桃枝
竹爲席次列成文也昨酢也按布茲者卽設莞筵
不言席省文也

召公奭贊采師尚父牽牲

正義曰贊佐也采幣也孔晁曰采事也倅王也張
按劉向云師之尚之父之曰師尚父望其名也師
尚父何以牽牲也凡祭王必自射其牲祭義曰祭
之日王牽牲卿大夫序從然則牽牲天子事也師
之尚之父之故以牽牲命之也一曰周官祀五帝
則冢宰贊牲皇甫謐云周公爲司徒召公爲司空
或尚父此時攝冢宰也

尹佚筮祝

張按卽史佚也正義曰尹佚讀筴書祝文以祭社也汲冢作尹逸筴

曰殷之末孫季紂

汲冢書作殷末孫受 逖先成湯之明張按紂謚也當依汲冢作末孫受孔晁云紂字受德張按孔說非也受字句德逖先成湯之明句

殄廢先王明德侮筴神祇不祀

汲冢筴作滅孔晁云神祇天地也舉天地則宗廟已下廢可知也

昏暴商邑百姓其章顯聞於天皇上帝

昏汲冢作明章作彰于作於天皇作昊天孔晃云
言上天五帝皆知紂惡也

於是武王再拜稽首

汲冢作周公再拜稽首乃出張按史佚祝王何緣
周公再拜若周公出召公尚父當皆出矣何獨書
周公出耶汲冢繆矣

曰膺更大命華殷受天明命

張按此史佚筴辭也汲冢無此文膺受也或以爲

戎狄是膺之膺膺當也更改也上指天命之所屬
下言武王宜受之也或以革殷受爲句亦通

武王又再拜稽首乃出立王子武庚命管叔相

立王子武庚以下汲冢文也史記云封商紂子祿
父殷之餘民武王爲殷初定未集乃使其弟管叔
鮮蔡叔度相祿父治殷已而命召公釋箕子之囚
張按汲冢簡史記繁當從汲冢管叔下當補一鮮
字

命畢公釋百姓之囚表商容之閭

命字上汲冢有乃字畢公下有衛叔無表閭事當
依史記張按史記曰商容賢者百姓愛之紂廢之
淮南子曰老子學商容見舌而知守柔矣皇甫謐
云商容與殷民觀周軍之入見畢公至殷民曰是
吾新君也容曰非也太公周公至民曰吾君也容
曰非也見武王民曰是吾新君也容曰然聖人爲
海內除惡見惡不怒見善不喜顏色相副是以知
之樂記曰使之行商容而復其位又韓嬰云商容
欲馮馬徒以伐紂不克去之太行山武王官之國

辭不受史記樂毅傳曰商容不達身祗辱焉以冀
其變及民志不入獄囚自出然後退隱尚書武成
表作式

命南宮括散鹿臺之財發鉅橋之粟以振貧弱萌隸
命字上汲冢有乃字括作忽鉅作巨闕以振貧弱
萌隸一句張按括古今人表作适萌氓也隸賤者
也見繁露新書左傳攷劉向新序曰紂爲鹿臺七
年而成其大三里高七尺臨望風雨服虔曰鉅橋
倉名鄒誕生曰鉅大橋器名也紂厚賦稅因器而

大其名尚書大傳云商民曰王之於人也死者猶封其墓況其生者乎王之於賢也亡者猶表其廬况其存者乎王之於財也聚者猶散之况其復籍者乎

命南宮括史佚展九鼎保玉

命字上汲冢有乃字括作伯達當從汲冢展作遷保玉作三巫徐廣曰保一作寶孔晁云三巫地名張按召誥序云遷鼎於洛邑三巫未詳适達八士之二也或以爲宣王時人誤

命閼天封比干之墓

命字上汲冢有乃字孔晁云封益其緣也張按閼
天文王四友之一也書君奭篇僅舉閼天姓氏事
蹟無攷史記云閼天求美女奇物文馬以獻紂紂
乃赦西伯墨子尚賢篇云文王舉閼天泰顛於豎
圉之中授之政而西土服荀子云閼天之狀面無
見膚揚僚註曰多鬚髯也比干墓中銅盤銘或云
卽武王所銘縣卿云哭比干之墓

命宗祝享祠於軍

汲冢云乃命宗祝崇賓饗禱之於軍張按國語曰
使名姓之後能知四時之生犧牲之物玉帛之類
采服之儀宗彛之量次主之度用攝之位壇場之
所上下之神氏姓之出而必率舊典者爲之宗又
曰使先聖之後能知山川之號宗廟之事昭穆之
世齊敬之勤禮節之宜威儀之則容貌之崇忠信
之質縹絜之服而敬恭明神者爲之祝荀子曰出
門而宗祝有事

乃班

張按此汲冢辭也孔晁曰還鎬京也史記云乃罷兵西歸

度邑解

孔晁無注故詳著之度於各反

序曰武王平商維定保天室規擬伊洛作度邑

維王赴殷國君諸侯乃厥獻民徵主九牧之師見王于殷郊

張曰獻賢也尚書大誥曰民獻有十夫徵主者卽泰誓所云友邦冢君也不期而會何以謂之徵也大會者若徵之而集云爾師長也衆也克殷解曰

百姓咸俟于郊迎辭也王班矣見于郊何居送辭也史記曰武王徵九牧之君

登幽之阜以望商邑永歎曰嗚呼不淑允天對遂命一日維顯畏弗忘

張按登幽之阜史記文也汲冢云王乃升汾之阜正義曰括地志云幽州三水縣西十里有幽原周先公劉所都之地也幽城在此原上蓋武王登此城望商邑張按爾雅曰大陸曰阜汾水在太原從史記作幽爲正或云汾字當爲邠卽古幽字也說

文引爾雅曰西至於汭國今爾雅正作邠字汭豈
汾之轉譌耶永歎以下汲冢文也淑善也允悅也
學記說命作允命荀子佞兌而不曲又見由則兌
而僭楊倞皆訓悅言天地之大德曰生紂之不淑
不能悅帝心而對越之遂命我周于今日天命匪
謚不可不顯畏也以上史記不載

王至于周自夜不寐

張按此史記文也汲冢云王至于周自口至于丘
中具明不寢疑有脫誤故從史記正義曰周鎬京

也武王伐紂還至鎬京憂未定天之保安故自夜
不得寐也

王小子御告叔旦亟奔卽王

張按此汲冢文也史記闕王小子一句曰周公旦
卽王所

曰曷爲不寐

張按此史記文也汲冢云久憂勞問周不寢曰安
予告于汲冢疑有錯簡從史記

王曰嗚呼旦維天不饗殷

張按史記曰告女汲冢曰惟天不享于殷今叅之
自發未生於今六十年麋鹿在牧蜚鴻滿野

張按此史記文也汲冢云發之未生至于今六十
年夷羊在牧徐廣曰此事出周書及隋巢子云夷
羊在牧牧郊也夷羊怪物也索隱曰按高誘曰蜚
鴻蟻蠓也隨巢子作飛拾飛拾蟲也正義曰蜚古
飛字麋鹿在牧喻讒佞小人在朝位也飛鴻滿野
喻忠賢君子見放棄也楊慎曰三說皆如眯目而
道黑白者詳此文據實事言非喻也蜚鴻馬名言

其養無用而害有用也胡應麟曰按竹書紂四十八年夷羊見蓋獫狁商羊之類史記訛爲麋鹿楊用修遂以鹿臺事實之陳晦伯正用修之誤然亦不引竹書夫紀年周書同出汲冢二事絕可互證而沈約孔晁注俱弗及他書尚何怪哉張按張華博物志曰太姒夢梓化爲松以告文王文王曰天不享于殷自發之未生於今十年夷羊在牧水潦東流天下飛鴻滿野華之言本太公兵法据此則武王述文王誥也夷羊之說武王未生特有之矣

何得云紂四十八年方見耶又周語內史過曰商之興也禱杙次于丕山其亡也夷羊在牧元瑞何不引周語而引竹書耶然予亦未敢以左氏張華之言爲徵而可信也夫神怪之事聖人所不道也武王勝殷得二虜問焉曰而國有妖乎一曰吾國有妖畫見星而雨血一曰此則妖也雖然非其大者也吾國之妖其大者子不聽父弟不聽兄君令不行此妖之大者也麋鹿蜚鴻吾從遷不從隨巢汲冢也用修之論甚正第以鹿臺傳麋鹿此來晦

伯元瑞曉曉耳孟子不云乎園囿汙池沛澤多而禽獸至鴻雁麋鹿復何疑焉蜚鴻作蟻蠓王元美卮言以高誘語爲據夫高誘不識乾鵠豈識蜚鴻用修復取馬名實之亦不經史記云紂廣沙丘苑臺多取野獸蜚鳥置其中蜚之爲飛昭昭矣或曰鴻雁也蜚蟲也如春秋莊二十七年有蜚之蜚語太鑿滿野汲冢作過野

蜚鴻馬名山馬賦云其名則自蟻雞斯蜚鴻母見云

云又見東方朔集

天不享殷乃今有成

張按此史記文也索隱曰言上天不歆享殷家故見災異我周乃成王業也汲冢云天自幽不享於殷

維天建殷其登名民三百六十夫不顯亦不賓滅

張按此史記文也索隱曰言天初建殷國亦登進名賢之人三百六十夫其後旣非大賢未能興化致理故殷家不大光昭亦不卽賓滅以至於今也見周書及隨巢子頗復脫錯隨巢子曰天鬼不顧亦不賓滅天鬼卽天神也張按此說非也此時戎

衣初定亂黨尚繁殷之遺老猶有寧爲頑民不爲
膚敏者觀多士多方二誥成王時猶蠢蠢焉武王
深憂之此度邑解之所以作也武王之意蓋以紂
之伐我不得而主之其不享殷者唯天之命武庚
之立我亦不得而主之其不絕殷而建殷者亦唯
天之命。按尚書多士云今爾其曰夏迪簡在王庭
有服在百僚予一人惟聽用德非予罪時惟天命
注曰今爾又謂商革夏命之初凡夏之士皆啓迪
簡拔服在百僚而周於商士未聞有所簡用也然

予所聽用唯德之庸今不爾用者非我罪是惟天命如此据此則武王時殷士大夫早有怨周之不我用者故曰其登名民三百六十夫名民民之有賢能名者卽所謂予一人惟聽用德也有虞氏官五十夏后氏官百有二十殷人官二百有四十周禮六官皆曰其屬六十則三百六十者周官制非殷官制也夫者卽民獻士夫之夫不顯亦不賓滅言殷士雖未廸簡王庭而我亦未嘗擯而滅之也汲冢云厥徵天民名三百六十夫不顧亦不賓

川戾于今嗚呼于憂茲難近飽于卹辰是不室我來
所定天保何寢能欲

難去聲

張按此汲冢文也史記云以至今我未定天保何
暇寐戾至也飽食也卹憂也辰時也室居也恐殷
未終定後且食其憂也辰是不室言不及是時莫
我之居也天保定爾見詩小雅注保安也我來所
定天保言我何修而可以來天保也誠思及此豈
暇寐哉蓋於是而武王之憂深矣孟子曰武王不
泄邇不忘遠乾之九三曰君子終日乾乾夕惕若

厲無咎武王以之

王曰旦子克致天之明命定天保依天室志我共惡
俾從殷王紂

張按此汲冢文也史記曰王曰定天保依天室悉
求天惡貶從殷王受蓋武王述不寐之故而以天
保屬周公重言王曰者史臣鄭重之辭也索隱曰
言悉求惡人不知天命不順周家者咸貶責之與
紂同罪故曰貶從殷王受張曰索隱之說非也胤
征曰殲厥渠魁脅從罔治曾聖人而淫刑以逞乎

言志我之所共惡者亦唯從紂爲虐如費仲惡來
輩餘固無所問也書多方曰我惟大降爾命罔不
知解書者曰降宥也卽其義也張按紂已焚宜從
謚汲冢爲長

日夜勞來我西土我維顯服及德方明

張按此史記文也汲冢曰四方赤宜未定我于西
土我維顯服及德之方明徐廣曰勞來一作宵來
張曰王者以天下爲家殷之民卽我西土之民也
故以勞來屬周公言我之顯服九有亦惟德之方

明而已豈以力服人者哉大哉王言世祖所以安反側用此道也

叔旦泣涕干常悲不能對王口口傳于後

張曰武王之歎其心湯之心者乎叔旦之泣其心文王之心者乎干常猶失其常度也以下皆汲冢文史記闕不能對下有脫簡不詳

王曰旦汝維朕達弟子有使汝汝播食不遑暇食矧其有乃室

張曰達弟者言諸弟之中惟汝能通我志也子有

使汝句疑錯簡或曰子殷姓也言我所以處殷有使汝不寧于懷者雖幸而勝之不能永清不能耆定如穀之已穡難食其成此室非周之有也

今維天使子惟二神授朕靈期于未致予休于近懷子朕室汝維幼子大有知

張曰維天使子言易殷而周天若使之也二神天地也說文亟字訓云从又从二二天地也或曰二當作示古祗字也靈期天命也緯書曰河圖將來告帝期又曰舜攷德運期立象所謂卜世三十卜

年七百也于語詞也休嘉也言天以大命集我溥
天率土且無貳心而殷之頑民近有未盡然者豈
予德之未明予休之未致不足懷之歟子者指武
庚而言言牧野之舉惟是救民水火非有私惡于
殷今大統已集予室卽朕室也予之心邦甸知之
侯衛知之壺漿之小人裸將之敏士悅服之萬姓
知之庚雖幼寧不鑒朕心焉

昔皇祖底于今勗厥遺得顯義告期付于朕身肆若
農服田饑以望稷予有不顯朕卑皇祖不得高位于

上帝

張曰皇祖謂后稷也底至也勗勉也遺詒也義告
猶義問也言自后稷以來太王之作邦作對王季
之其勤王家文王之惠鮮鰥寡其黽勉以詒孫謀
者惟以大義相告得昭然于天下然則朕之身作
邦作對之身也其勤王家之身而惠鮮鰥寡之身
也朕無義則無祖無祖則無身朕之扶義而法祖
者豈啻農之望歲哉義者何也曰宜也順天焉爾
已救民焉爾已若予以天下爲利而義問有不顯

焉是徒以不得配天者爲皇祖耻也夫皇祖亦知有義而已矣豈以位爲高卑哉

汝幼子庚厥心庶乃來班朕大環茲于有虞意乃懷厥妻子德不可追于上民亦不可答于朕下不賓在高祖維天不嘉于降來省汝其可瘳于茲

張曰庚更也檀弓云請庚之班列也環衛也管子云環山于有牢省視也言武庚之心或疑予以殷爲利今予心已顯于天下汝幼子復何所疑庶幾更其習心來就三恪之列朕以汝爲侯衛永作周

賓如有虞之胡公然若朕以殷爲利是懷妻子而
蔑天人且忘祖父之義訓矣上以追其先弗受
下以答其民民弗順卽祀高祖于明堂以配天天
亦不下賓之而休嘉豈予降哉我之心先王之心
也先王之義也此心無不可對而深達我心者唯
汝一人今汝來視我我之可爲天下後世言者悉
爲汝言之而向者之憂其可釋然而瘳矣

自今我兄弟相後我筮龜其何所卽今用建庶建

相

張曰相佑也後後人也兄弟相我後人所謂定天
保也筮龜者卽召誥之卜宅筮龜其何所謂謂依
天室也武王復曰我之拳拳焉爲予室慮者豈徒
自爲久長計哉予且天下爲公大建蕃衛列爵五
而分土三卽今用建庶建也蓋聖人不以天下私
其身者如此曹冏曰先王知獨治之不能久也故
與人共治之知獨守之不能固也故與人共守之
得武王之旨矣

叔旦恐泣涕共于王曰嗚呼旦我圖夷茲殷其惟依

大其有憲命求茲無違天有求繹相我不難

共上聲
相去聲

共如衆星共之共夷傷也殪也繹繼也周公恐而
泣泣而歎曰王之心微王言旦故已知之今殪殷
而有天下昊天有成命王不得而違之非王心也
命不于常枉德不在險求依天室何以遠爲夫真
能繼天者上帝之所求也唯德之明義之顯而後
可以繼天王能明德顯義隨其所宅皆天室皆天
保矣天何難佑我後人哉蓋成王他日營成周而
卜曰予一人兼有天下辟就百姓敢無中土乎其

予有罪則四方伐之無難得也周公居曲阜其命
龜曰作邑乎山之陽賢則茂昌不賢則速亾此求
茲無遠之意也

自洛汭延于伊汭居易毋固其有夏之居

易去聲毋讀爲無

張按史記汲冢文同易汲冢作陽毋汲冢作無索
隱曰言自洛汭及伊汭其地平易無險固是有夏
之舊居帝王世紀云禹封夏伯今河南陽翟是汲
冢古文云太康居斟尋井亦居之桀又居之

我南望三途北望嶽鄙顧瞻有河

張按此史記文也途當作塗索隱曰杜預云三塗在陸渾南嶽蓋河北太行山鄙都鄙謂近嶽之邑汲冢云我南望過于三塗我北望過于有嶽不顧瞻過于河徐廣引周書武王問太公曰吾將因有夏之居南望過于三塗北詹望于有河與汲冢文小異不知何據張按服虔云三塗大行轅轅峭澗也

粵詹雒伊母遠天室

母讀作無

張按史記文也正義曰粵者審慎之辭也言審瞻

雒伊二水之陽無遠離此爲天室也汲冢云宛瞻于伊洛無遠天室

其曰茲曰度邑

度入聲

張按此汲冢文也史記云營周居于維邑而後去正義曰括地志云故王城一名河南水郊鄆周公新築自平王以下十二王皆都此城至敬王乃遷都成周至赧王又居王城也張按書召誥曰王來紹上帝自服于土中洛誥曰我乃卜澗水東瀍水西惟洛食是往營成周在成王時矣此度邑何以

稱焉蓋汲冢序曰周公既誅監乃述武王之志建
都伊洛作洛則所稱南繫于洛水北因于刺山
以爲天下之大湊者武規之旦營之及孺子而後
能述之也不然九鼎之遷不鎬不豐胡洛之先哉
予觀武周君臣兄弟之間均憂共惕猶若商之未
定而統之未集者殷殷焉相儆以德相勗以義推
誠心以安反側凜天保以布大公卒之監畔奄遷
洛食微命褒燭驪侵七廟遂東券彼先規握期勿
爽嗟乎百世可知非聖人而能若是乎

吹景集卷之八

烏程

董斯張遐周著

韓昌箕仲弓訂

史記殷本紀逸書

焦澹園曰趙子昂歸太僕梅學正俱辨尚書古文
爲僞書則今所傳湯誥亦非伏生口授矣按史記
中載湯誥與古文絕不同其文較四十二篇似相
類當取史記叅之錄殷本紀并徐廣索隱注間有
一得亦附之如左

序曰旣絀夏命還亳作湯誥

維三月王自至於東郊告諸侯羣后母不有功於民
勤力廼事予乃大罰殛女母予怨

張按記曰殷人先罰而後賞信然哉乃司馬法曰
夏后氏賞而不罰殷人罰而不賞誣矣

曰古禹臯陶久勞于外其有功乎民民乃有安

張按八年於外惟神禹獨也久擬之周官禹冬而
臯陶秋也其竝舉治水之績云何疑有錯簡當曰
禹臯陶有功乎民民乃有安禹久勞于外云云

東爲江北爲濟西爲河南爲淮四瀆已修萬民乃有
居后稷降播農殖百穀三公咸有功于民故后有立
徐廣曰立一作土索隱曰謂禹皐陶有功於人建
立其後故云有立

昔蚩尤與其大夫作亂百姓帝乃弗予

音與有狀

索隱曰帝天也謂蚩尤作亂上天乃不佑之是爲
弗與有狀言其罪大而有形狀故黃帝滅之

張按呂刑云蚩尤惟始作亂延及于平民罔不寇
賊賜義好宄奪攘矯虔鄭玄注云蚩尤霸天下黃

帝所伐者夫夏命始紬率土更新當急繕寬大之
政而乃援蚩尤以厲侯服何哉蓋禹之明德遠矣
昆吾韋顧雖已就僇而餘孽且繁或有借斟尋之
說以倡亂于天下湯故援此以戒之言力如蚩尤
可以霸矣而卒有涿鹿之敗不言昆吾而言蚩尤
蚩尤神農氏之霸昆吾夏后氏之霸也曰禹曰臯
陶曰后稷皆先臣堯而後臣舜者也噫其詞微矣
竹書曰桀卒于亭山禁弦歌舞只此一端湯心與
虞夏何異孟子曰若湯則聞而知之季札曰聖人

之弘也而猶有慙德真知言哉若汲冢書殷祝解
曰湯放桀再拜從諸侯之位讓三千諸侯莫敢卽
位然後湯卽天子之位與諸侯誓曰陰勝陽卽謂
之變而天弗施雌勝雄卽謂之亂而人弗行此則
太似不情其詞亦與周書不類定爲後人彛入且
繫書于周何得專紀殷事可刪也

先王言不可不勉曰不道毋之在國

徐廣曰之一作政索隱曰不道猶無道也又誠諸
侯云汝爲不道我則無令汝之在國

女毋我怨以命諸侯

張按國語內史過引湯誓曰余一人有辜無以萬夫萬夫有辜在余一人今載之湯誥以方字易夫字湯誥中此語似亦後人所竄者左丘明當不妄取湯誥爲湯誓今湯誓亦非全文哉

泰誓今文 湯武逸書

河內女子所獻泰誓一篇亦與古文不同按史記武王渡河中流白魚躍入王舟中武王俯取以祭旣渡有火自上復于下至于王屋流爲鳥其色赤其聲魄

云索隱曰此已下至流爲烏見今文泰誓馬融曰王
屋王所居屋流行也魄然安定意也鄭玄曰書說云
烏有孝名武卒父大業故烏瑞臻赤者周之正色也
索隱曰按今文泰誓流爲鵬鵬鷺鳥也然則今文泰
誓唐初猶有存者卽河內女子本也惜無從見之又
詩疏引泰誓曰師乃餘課前歌後舞格于上天下地
咸曰孜孜無怠又引泰誓曰司馬在前漢書引泰誓
云立功立事劉歆三統曆論引今文泰誓云丙午還
師以上四則說苑引泰誓曰附下而罔上者死附上

而國下者刑與聞國政而無益於民者退在上位而
不能進賢者逐墨子引泰誓曰小人見姦巧乃聞不
言也發罪鈞又引泰誓去發篇曰惡乎君子天有顯
德其行甚章惟我有周受之上帝毛詩註疏鴻雁小
序注引書曰天將有立父母民之有政有居疏云今
泰誓文言天將有立聖德者爲天下父母民之得有
善政有安居爲重也漢郊祀志引泰誓曰稽古立功
立事可以永年丕天之大律注今文泰誓也

以上二則見學

齊估

此皆古文不載者史記載湯征亦逸書其詞云

湯征諸侯葛伯不祀湯始伐之湯曰予有言人視水
見形視民知治不伊尹曰明哉言能聽道乃進君國
子民爲善者皆在王官勉哉湯曰汝不能敬命予大
罰殛之無有攸救作湯征又周本紀云九年武王上
祭于畢東觀兵至于盟津爲文王本主載中軍武王
自稱太子發言奉文王以伐不敢自尊乃告司馬司
徒司空諸節齊栗信哉予無知以先祖有德臣小子
受先功畢立賞罰以定其功遂興師師尚父號曰總
爾衆庶與爾舟楫後至者斬按此文語極爾雅今書

不載豈亦書之逸篇耶并錄於此

史漢引詩書異同略

漢書中多與今詩文字異同古今人表南仲作南中
仲山甫作中山甫張仲作張中蕃維司徒蕃作皮中
允膳夫允作術槩子內史槩作振槩維師氏槩作萬
功臣表徐方旣來之來作徠匡衡傳嬖嬖在疚之嬖
作亮劉向傳滄滄訛訛之滄作歛黽勉從事作密勿
從事說日囂囂之囂作噉日有食之之食作蝕山冢
萃崩之萃作卒王莽傳不畏強禦之禦作圉邦國殄

悴之悴作頽地理志駟鐵作駟載淇澳作淇與敘傳
武哲或謀之哲作慙又史漢引書與今文字異者堯
典俊德之俊史記作駟宅囑夷史作郁夷平秩東作
平秩史作便程鳥獸葦尾葦尾史作字微平在朔易
史作便在伏物厥民隤隤史作與有鰥史作有矜釐
降史作飭下舜典惟刑之恤哉恤史作靜今文幽州
史作幽陵阻饑史作始饑今文五品不遜史作不駟
五流有宅史作有度胄子史作穉子契漢百官表作
尚皐陶百官表作咎繇益百官表作莽古今表作栢

益臯陶謨臯陶曰都史作於勵翼史作高翼夙夜浚

明史作蚤夜翊明祗敬史作振敬益稷五聲八音在

治忽史作來始滑

索隱曰古今尚書作在治忽今文作來政忽先儒各隨字解之今此

云來始滑義無所通蓋來采字相近滑忽聲相亂始又與治相似因誤爲來始滑今依今文音采政忽三字劉伯莊云聽諸侯能爲政及忽怠者是也罔水行舟罔史作母勅天之

命勅史作陟殿言史作揚言禹貢刊木刊漢書地里

志作朶衡漳之漳漢作章島夷之島史漢俱作鳥濟

河之濟漢作沛兖州之兖史作沅灘沮之灘史漢俱

作雍厥篚之篚漢作棐灘溜漢作惟留廣斥史漢俱

作廣渴縈絲史作會絲夏翟之翟漢作秋泗濱漢作
泗濱暨魚暨史漢俱作鳧彭蠡既豬豬史作都陽鳥
攸居攸漢作迨瑤琨漢作瑤瓊沿于江海沿史作均
達于淮泗達漢作通孔殷史作甚中沱潛之潛史作
沱漢作潛羽毛史作羽旄逾于洛史漢俱作維榮波
史作榮播孟豬史作明都漢作盟豬岷嶓史作汶嶓
青黎史作青驪西傾漢作西頃是來漢作是徠崑崙
史作昆侖陪尾史作負尾孟津史作盟津大伾史作
大邳澤水史作降水導瀼史作導瀼滄浪史作蒼浪

至于禮史作至于禮東述史作東述四隩史作四奧
刊旅史作朶旅男邦史作任國西戎卽敘之敘漢西
域傳作序甘誓拏戮拏史作祭湯誓穡事史作嗇事
正夏史作政夏大賚史作大理仲虺之誥虺史作罍
荀子作中節說命傳巖史作傳險高宗彤日雝雝史作响
雝雝先格王漢孔光傳作假王天既孚命孔光傳作
天既付命王司敬民司史作嗣戡黎之黎史作饑一
作者格人史作假人微子父師史作太師淪喪史作
典喪出狂史作出往家耄遜于荒史作家保于喪指

告之指史作故牧誓微盧之盧史作縕如熊如罷史
作如豺如離洪範鯀陞洪水之洪史作鴻敬用五事
之敬漢五行志作羞思曰睿之睿漢作睿從作乂之
又漢作艾虐輶獨史作侮鰥寡無黨無偏之無史作
毋敷言之敷史作傅沉潛之潛史作漸曰霽之霽史
作濟曰蒙之蒙史作涕漢作霑音遘衍忒之忒史作
資蕃廡史作繁廡恒暘史漢俱作恒暘豫恒煥史漢
俱作舒恒與王省史作王肯俊民史作峻民金縢遘
厲虐疾史作勤勞淹疾丕子史作負子實命史作豫

命大誥天棐忱辭之忱漢孔光傳作謹召誥無遺壽
考作無遺耆老無逸史作毋逸亮陰史作亮闇嘉靖
史作密靖君奭甘盤史作甘般又王莽傳云我嗣事
子孫大不克其上下遺失前人光在家不知命不易
天應棐謹乃亡隊命亦與今書少異洛誥無若火始
燄燄漢書作毋若火始庸庸公無困哉漢作公無困
我肅慎之命史作息慎顧命彤伯漢古今表作師伯
虎臣漢作龍臣仲桓漢作中桓南宮毛漢作南宮髦
冏命之冏史作界漢作熨呂刑史作甫刑墨辟之墨

史作黥百鏹之鏹史作率音制一作選惟倍史作倍
瀝一作倍蓰荆辟之荆史作贖費誓之費史作盼一
作鮮一作獮按王伯厚云尚書文字異同者七百餘
茲畧舉史漢如右若漢儒引書異字異義備載玉海
及困學紀聞餘冬序錄亦不具錄

漢隸孔彪碑無偏無黨遵王之素王

君廟碑曰庶績咸熙諸書亦不載

補王伯厚詩攷

伯厚詩攷引諸書中字義異同及薛君韓詩章句極
詳歟茲更得十餘則補之 荀子引節南山云維天

于是庫卑民不迷庫今作毘卑今作俾 子華子引

野有蔓草云有美一人清風婉兮風今作揚 說苑

引柔苗原隰既平泉流既清本立而道生 漢隸薛

君碑引詩永矢不愆

考繁今作弗諼

水經注引魯頌保其

鳧嶧

韓詩于嗟歎辭

薛君章句騶虞文選注

使我心癆

伯今

文選注

彼已之子碩大且篤非良薦脩身行之君子

其孰能與之哉

椒聊韓詩外傳

和樂且湛薛君曰樂之甚

也

常棣文選注

檀車綏綏

杜杜伯厚引作張張誤釋文

彼交庶紆

天子所予言必交吾志然後予

采菽外傳

刑于寡妻刑

正也

思齊釋文

烝美也濯美也

文王有聲釋文

薛君曰疊水

流貌

見鷲文選注

對彼雲漢薛君曰宣王遭亂仰天也

雲漢文選注

薛君曰幹正也謂以其義非而正之

韓奕文選

注伯厚引

薛君曰宋襄公去奢節儉

高頌文選注

師

臣者帝交愛臣者王臣臣者霸臣不行者亡

韓詩內傳伯厚

引此亦闕下二句

又姜后曰唯鳩之鳥猶未常見其乘居

而匹遊

文選注按此當本三家詩說

此皆困學翁之所逸也

逸孟子

王伯厚玉海云孟子有外書四篇性善辨文說孝經

爲正其文不能弘深不與內篇相似又錄論衡法言
諸書引逸孟子十則因學紀聞補入鹽鐵論三則何
燕泉引鮑昭河清頌梁處士傳序二則史慶長學齋
佔俾引鹽鐵論堯舜之道非遠人也數語茲更得八
則附伯厚慶長燕泉後高子問於孟子曰夫嫁娶者
非已所自親也衛女何以得編於詩也孟子曰有衛
女之志則可無衛女之志則怠又吞舟之魚不居潛
澤度量之士不居汙世夫藝冬至必彫吾亦時矣並
見韓詩外傳今人之性善將皆失喪其性故也又人

之學者其性善見荀子性惡篇人知以食愈饑莫知以學愈愚見劉向說苑阿諛事貴脅肩所尊俗之情也見後漢張衡傳注千年一聖謂之連步見梁蕭綺拾遺錄戰者危事也見北堂書鈔世間方冊何限子輿逸語要自不乏恨僕家藏書都散世不乏嗜古者博搜之或得片語殊勝真珠船也

學齋帖哩又引孟子曰吾於河廣知

德之至也張按今本益鐵論及王逸楚辭章句所引並作孔子曰絕祖所据殊誤

論語孟子文字異同

伯厚載逸論語二則齊論有問王知道二篇又釋文

中魯讀十九事瓜祭之讀爲必祭晦庵亦從魯讀矣
今證之說文史漢與語孟文字頗有同異論語說文
以杖荷篠篠作筱色勃如也勃作孛不使勝食氣氣
作旣啓予足作踰予之足昇善射昇作琴文質彬彬
作份份瑚璉之璉作璉仍舊貫之仍作扔磬磬之磬
作磬褻裘長作結衣長友便佞之便作謫諫曰作謫
曰翼如也作翹如小人窮斯濫矣濫作熾熾子路於
季孫慤作訴狐貉作狐貍荷簣而過孔氏之門作荷
曳耒而不輟耒作耒史記師也辟之辟作僻由也諺

之諺作嘑縲綫作累繼尚德哉作上德哉吾與黠也
作歲也巫馬期之期作旗申根作申黨歸與歸與作
歸乎歸乎便便言作辯辯言君召使擯之擯作儼未
由也已之末作篋鳳鳥不至作維不出書漢古今表
播鼓武之鼓作鞞仲突仲忽作中突中習虞仲作虞
中漆雕開作漆雕啟仲叔圉作中叔圉黨童子之
闕作厥棘子成之棘作華荷蕢之荷作何微生畝作
尾生晦佛盼作菲盼宣元六王傳無求備於一人之
無作毋薛宣傳焉可誣也之誣作憊朱雲傳攝齊升

堂之齊作齋元后傳無所措手足之措作錯東方朔
傳卞莊子作弁嚴子無爲而治漢隸孟郁碑作無爲
如治薛君碑鑽之彌堅之鑽作鑄劉修碑鄉黨恂恂
作遜遜祝睦碑又作遜遜蔣君碑遵五屏四費鳳碑
泥而不滓洪氏以爲涅而不緇又初學記引逸論語
云玉十謂之區注雙玉曰穀五玉曰區北堂鈔引逸
論語云璠三采玉也升菴引逸論語云如玉如瑩爰
變丹青此亦伯厚所未載孟子白鳥鶴鶴說文作翬
翬成覲作成覲源源而來之源作譔孝子之心爲不

若是愁作忒接浙而行作澆浙二女果作嫫迨天之
未陰雨迨作隸曾西艷然作炆然史記梁惠王謀欲
攻趙孟子稱太王去邠又顏瞽由作顏囑鄒漢古今
表樂正裘牧仲作樂正求牧中華周作華州食貨志
抱關擊柝之柝作櫟漢隸議郎元賓碑枉尺直犗齊
民要術引雖有鎡基作鎡鋸諸家定有師承非臆說
也

孔子於衛主癉
疇說苑作雍雅